

# «Uschè bler sco necessari, uschè pauc sco pussaivel»

Las autoritads per la protecziun d'uffants e creschids è pir en la fasa da constituziun e consolidaziun

DA MARTIN CABALZAR

■ **Cun quai che las nov creadas autoritads per la protecziun dals uffants e creschids èn anc pér en la fasa da constituziun resp. consolidaziun na possian ins anc betg far in giudicament definitiv. Quai ha la regenza respundì ad ina dumonda parlamentara da deputada Agnes Brandenburger (pps Tschintg Vitgs).** Avant dus onns èn las anteriuras autoritads tutelaras dals circuls vegnidas remplazzadas da la nova «Autoritad per la protecziun d'uffants e da creschids» (Apuc). Sco quai che l'interpellanta *Agnes Brandenburger* ha constatà haja questa midada per part chaschunà enorms custs per las vischnancas. Las experiencias fatgas en auters chantuns mussan che las vischnancas pertutgadas vegnian obligadas da surpigliar garantias da custs e da finanzia la mesiras concludidas da la Apuc, ma ch'ellas vegnian infurmadadas mo fitg mal u in summa betg davart las mesiras concludidas. «Or dal puntg da vista da las vischnancas e dals pajataglias na va i betg che las autoritads communalas partecipadas a la procedura vegnan privadas sistematicain d'informaziuns decisivas», accentuescha Agnes Brandenburger. Las vischnancas sajan numnadain era sutmessas a la protecziun da datas ed a l'obligaziun da discreziun gist tuttina sco la Apuc che priveschia las vischnancas da las informaziuns sut il pretext da la protecziun da datas e dal secret d'uffizi.

Tenor Brandenburger èsi ussa, suenter dus onns, temp da trair in facit e d'eventualmain far adattaziuns necessarias pertutgant tant la basa giuridica sco las resursas finanzialas e persunalas.

## Ilis custs per las vischnancas

Tenor la regenza sa resultan per las vischnancas custs en dus resguards. Per l'ina surpiglian ellas proporziunalmain



Tenor deputada Agnes Brandenburger (pps Tschintg Vitgs) chaschunan las mesiras per la protecziun d'uffants e creschids per part enorms custs per las vischnancas.

FOTO O. ITEM

ils custs per la gestiun da las curatellas professiunalas regiunalas, per l'autra èn ellas er obligadas da surpigliar subsidiarain ilis custs da las mesiras da protecziun d'uffants e creschids. Quai sin fundament dad art. 63 al 2 da la lescha introductiva tar il Cudesch civil svizzer. Ilis custs che seresultan uschia per las vischnancas na possia il chantun betg numnar en cifras, ha cusseglier guvernativ *Christian Rathgeb* stuì conceder.

Il rom dals custs per las proceduras da la Apuc saja dentant prescrit a la Apuc. Uschia haja la Apuc incassà l'onn 2013 custs da procedura da circa 400 fin 500 francs en la media. L'import maxi-

mal d'in quint da procedura en in cas singul haja muntà a 4580 francs.

## Betg tut las annunzias fineschan cun ina mesira

En cifras absolutas na sa laschia era betg preschentar la durada media d'ina procedura davant la Apuc. Tut tenor ilis fatgs e lur urgenza relaschia la Apuc ina decisiun entaifer in fin dus lavurdis. Dentant na mainia betg scadina annunzia da periclitaziun ad ina mesira resp. ad ina decisiun, sincerescha Rathgeb sin la dumonda correspondentada da Brandenburger. En il sector da la protecziun da creschids vegnian terminads circa in

terz ed en la protecziun d'uffants circa 40 pertschient dals scleriments senza ina mesira, resp. decisiun. En cas da situaziuns da periclitaziun latents possia però er durar onns fin ch'ina decisiun possia vegnir prendida.

## Consultaziun gea, dentant nagin dretg da prender invista da las actas

Sch'ils interess finanzial d'ina vischnanca èn pertutgads particularmain d'ina mesira previsa han las vischnancas in dretg d'audiziun. Las vischnancas vegnian perquai consultadas ordavant u posteriurain en cas ch'in privel sa resultia dal retard. «In dretg da prender

invista da las actas n'han las vischnancas – tenor dretg federal – dentant betg», constatescha Christian Rathgeb.

## Subsidiaridad e commensurabladad

Agnes Brandenburger ha dentant era vuli savair da la regenza sche la Apuc empovia da chattar soluziuns equilibradas tranter ilis interess tutelar e las consequenzas finanzialas per las vischnancas pertutgadas.

Tenor dretg federal ha la Apuc l'incumbensa d'evitar resp. parar adequatmain periclitaziuns da creschids u uffants che han basegn da protecziun e d'assistenza. Tenor la regenza stat il dretg da protecziun d'uffants e creschids fermamain sut l'ensaina dal princip da subsidiaridad. La Apuc intervegn pir sche geniturs u creschids na reusseschan betg sezs, profitond da las purschidas facultativas dil princip da la commensurabladad. Il motto saja: «Uschè bler sco necessari, uschè pauc sco pussaivel». Suandond il princip da la commensurabladad ordineschian las Apuc la mesira adequata che è mintgamai la pli favuravla. Christian Rathgeb conceda dentant era che bleras giadas existia nagina pussaivladad d'eleger damai ch'i dettia in summa mo ina purschida adequata.

## Ina revisiun è necessaria

Era sch'i saja memia baud da trair ina bilanza per in giudicament definitiv sajan tschertas adattaziuns necessarias, conceda Rathgeb. Revedidas vegnian probabel cunzunt las disposiziuns concernent ilis custs da procedura e da mesiras. Pli navant vegnia examinà la pussaivladad da megliar il modus da facturaziun per ilis custs dals mandatari da las curatellas professiunalas. Era sin plaun federal veglian ins evaluar la qualitad, ilis custs ed il dumber da las mesiras pridadas sco era da controllar sche las finamiras da la revisiun dal dretg tutelar èn vegnidas contonschidas u betg.